

四庫全書

集部

欽定四庫全書

高峯文集卷七

宋 廖剛 撰

辭免

辭免 缺

辭免 缺

臣准 缺 告以臣 缺

作官兵不至事 缺

揮蒙貸 缺

辭免兼侍講

臣伏准四月九日尚書省劄子奉聖旨兼侍講春秋者竊惟侍講之職蓋將發明聖經淵奧之旨以上裨緝熙光明之學自古非博洽洪儒著名當世者不以充選如臣凡庸初乏術業且復年齡垂暮昔所涉獵遺忘殆盡乃使接跡諸儒侍經帷幄期以燭火之微助日月之光輝詎克勝其任哉况春秋之書先聖人寓意於一筆削之間以待天下後世其或智未足以知聖人之心則亦

多見其肆臆說以害正理王通所謂三傳作而春秋散是也又况不如丘明公穀輩乎又况每下如臣之淺陋者乎是以聞命震懼不知所謂而輒自列也兼臣近以氣血衰耗左足發痛屈伸步履有妨見在朝假多日方圖剡奏乞骸骨歸田里重惟君父之恩天隆地厚區區不勝犬馬戀主之情猶欲俟疾稍間乞一賜對披瀝肝膽庶幾睿明亮其甚非得已俯賜矜從此意未伸遽復有此恩命臣誠憂恐無以自處伏望聖慈姑賜追寢所

降指揮使臣少安愚分得以徐為去就不勝幸甚

辭免徽猷閣直學士

臣今月七日准尚書省劄子節文三省同奉聖旨除臣徽猷閣直學士知漳州者聞命震驚罔知所措臣聞聖人策士大夫以名蓋所以旌有德表賢能以為天下勸者也苟德業無取事功蔑聞詎可以倖得之哉臣猥以庸材濫塵法從周旋省部無補絲毫屬嬰殘疾乞解職任實欲便已私耳蒙恩假守已為厚幸所不敢辭者有

民有社可以布宣德澤庶幾不為素餐若聯榮學士寓直西清是為峻職臣何為者遽敢冒此寵數朝廷職名自有次序必揚歷華近聲績久著者然後以為學士况臣叨遷二卿纔三數月退省愚分憂非所安所有上件職命臣不敢祇受伏望聖慈收還誤恩庶協公議

辭免御史中丞

臣准尚書省劄子奉聖旨除御史中丞日下供職者聞命震驚罔知所措臣以恭依指揮赴臺供職外竊惟御

史府實法度紀綱之所在而中執法於今惟長官自非  
負高明之才剛大之氣通達治體鑒別人材則何以糾  
肅官邪維持國是選任之重今昔所難臣學植荒蕪智  
識淺陋曩備臺屬詎今二十年已齒髮衰殘心力殫耗  
嘗露乞身之請未蒙矜許更賜收召臣仰戴異恩感涕  
交集控辭不獲黽勉就道茲進對忽被親除非臣衰老  
所克堪任若更叨竊非據不惟失愚臣量力之義亦恐  
累陛下知人之明伏望聖慈特降睿旨收還成命別授

真賢以副輿論臣不勝拳拳激切之至

辭免工部尚書

臣今月十五日准尚書省劄子三省同奉聖旨除臣工部尚書日下供職臣聞命震懼罔知所為臣庸懦不才謬當要職暮年自惟毫髮無補久合告罷而况年齡垂暮日覺亡堪遂騰請老之章覲逭瘵官之罪聖慈天覆未忍棄捐更賜撫存俾安厥職仰體至意不合喋喋拒違然而方深愧惕彷徨未知所措忽奉睿旨乃復有此



寵命區區之心其何能安竊惟起部之長自古不必備  
惟營宗廟宮室則暫置已乃省去今猥以瘡老無用之  
人尸之豈適有不已之事而真乏人耶重念臣至衰謝  
惟是退處田里休養羸軀以待盡則其所願伏望聖慈  
收還誤恩從臣所請許守本官致仕庶安愚分

乞出

起居舍人乞出

臣昨在閑廢中蒙恩擢寘郎曹間關未克祇赴蒙就除

本路提刑已復召還遂自吏部郎官入侍殿陛如臣凡庸叨冒多矣所宜廩捐軀命以圖報稱而臣才識短淺不能有所建明所職闕然日惟旅諸僕御瞻望清光而已臣雖不肖亦知愧恥日夜誠不自安重念老母九十歲在朝既無絲髮之補去家又闕甘旨之奉喜懼之年人子所惜進退之際義當何如欲望聖慈特垂矜憫除臣便鄉一小郡臣素居民間庶能宣布德澤綏撫疲瘵因得不廢親養亦足以示陛下廣孝道器使士類之大

臣無任祈天俟命激切屏營之至

刑部侍郎乞出

臣輒瀝危懇上干天聽仰賴陛下天地之量俯賜矜憐未從誅殛則臣萬幸伏念臣愚陋無堪昨緣朝廷除擢過分招致人言陷於罪籍陛下回日月之照於覆盆之下使淪溺黜闇之迹復得齒於搢紳且又真之要職備數從臣陛下所以賜臣厚矣所宜殞首碎身圖報萬一雖才力淺短無以自効豈不日夜在念而臣賦分窮薄

不勝寵榮邇來氣體日衰疾病迭作尤苦左臂時時發痛  
不可屈伸緣此數廢朝謁深用不遑若不控告君父求  
解職任稍存臣子進退之節正恐起居失次或至顛仆不  
支為班之列羞取笑士類此臣所以不避誅責輒敢有  
請伏望陛下推天地父母之心察其在朝莫能有補特  
賜指揮除臣一宮觀在外差遣使得休養三二年倘未  
填溝壑猶覲得盡餘齡以効犬馬之報臣無任祈天望  
聖激切屏營之至

再乞出

臣近奏具陳乞外任宮祠伏奉詔書不允者臣仰荷聖  
慈撫存臣子之意感激恩榮不任惶懼然臣區區有不  
得已者輒罄愚衷再瀆聰聽竊惟天地父母之心必加  
矜憐未即誅竄則臣之幸重念臣庸虛一介遭遇聖朝  
特達之知擢寘近列日從諸賢獲望清光於九陛之下  
臣非木石豈不貪此寵榮所為干冒威嚴求解職任實  
緣犬馬之齒垂暮衰病日侵所患臂痛正妨朝請故雖

欲長戀軒墀不可得耳况臣自還從班於茲暮歲甲兵  
錢穀既非所知獻納論思畧亦無補日夜負愧久已不  
能自安重以賤疾將有顛踣不常之患如此而不引去  
尚妨賢路是不復有廉恥也陛下亦何以臣為伏望聖  
慈察其悃悞俯從所請若以為尚可驅策未欲置之閑  
散願得一小郡為陛下撫綏貧弱禁戢姦兇庶幾可竭  
疲駑亦不徒費祿廩臣所不敢辭也仰冀乾坤之造不  
違螻蟻之誠臣無任屏營戰慄激切懇禱之至

又再乞出

臣前具奏乞外任宮觀蒙聖慈降詔不允臣於次日輒復昧死罄竭愚衷再瀆威嚴累日聽候未得指揮臣誠惶誠懼不知所為重念臣犬馬之齒六十有七在朝最為衰暮疾病既侵氣體頓弱况復肘臂屈伸有妨若冒寵榮不力引退縱無人言豈不自愧不惟負愧實恐支持不行臣之區區具布前奏伏望聖慈曲垂矜察特賜允從臣無任瞻天祈聖激切懇禱之至

乞致仕

漳州乞致仕

紹興八年九月十一日發

竊以人臣之義論其死乃已曷可言歸然而大夫之年  
至於老而傳亦容自便蓋筋骸既不堪於事任則祿位  
固宜謝於寵榮伏念臣猥以虛庸誤蒙飭擢亟從冗散  
躡致高華叨塵今八九年潦倒且七十歲艱難何補空  
懷犬馬之憂病患相仍况是楓蒲之質形神疲弊氣血  
衰殘深惟民社之重不可以偷安復畏簡書之嚴空難



於苟免念仲尼戒得之訓稽老聃知止之規輒申螻蟻  
之誠仰幸乾坤之造恭惟皇帝陛下體天道大育物仁  
深每加意於臣鄰常俯從其志願伏望矜其衰朽錫以  
休閒許臣守官致仕冀克收於晚景庶無負於初心矧  
類南箕曾乏簸揚之助爰瞻岱麓未妨尋抱之除生欠  
捐軀沒期結草

被召命乞致仕

八年興  
化軍發

臣某言十二月十三日伏奉詔書以臣陳乞守本官致

仕不允者頽齡莫制方騰告老之章舊物不遺已降召  
還之命載頒溫詔曲示眷懷顧衰朽之奚堪第兢凌之  
增劇臣某誠感誠懼頓首頓首伏念臣初無他技獨守  
朴忠濫厠跡於禁廷蔑聞補報獲承流於鄉邑實竊便  
安既匪李躬年耆而學明又媿百藥齒宿而才壯偶未  
填於溝壑寧有覲於桑榆懇到愚衷蓋念首丘之無日  
丁寧天語更令衣衾以生輝義不得辭恩將曷報此蓋  
皇帝陛下堯仁天錫湯德日新靡求備於一夫欲兼收

於衆善豈謂散樗之卷曲無足取材尚憐老馬之虺隤  
或能知路斷來章之再請使力疾而一行臣聞命靡遑  
驅車恐後亦欲效鉛刀之一割敢徒矜敝帚之千金蟲  
鼠何心盡託乾坤之造海岳可助誓將頂踵之捐臣無  
任瞻天望聖激切屏營之至

御史中丞乞致仕

臣輒申愚悃上瀆聖聰臣昨守漳州於前年九月內上  
章乞致仕未得指揮間被旨召赴行在既造朝遽蒙陛

下誤恩付以臺事冒昧就職於茲一周星矣空疎無術  
初乏建明朴拙寡聞鮮所彈擊激懦衰而莫振竭短見  
以徒勤訖無補於朝綱實有妨於賢路重念臣犬馬之  
齒七旬有奇蒲柳之姿百年能幾素苦臂疾近覺目昏  
形既弊而學術亦衰學益荒而語言奚取日虞瘵曠重  
積罪愆伏望皇帝陛下施天地父母之恩遂草木魚蟲  
之性矜其不逮亮其不欺特賜罷免御史中丞依昨所  
乞許臣守本官致仕庶幾末路不負初心臣無任祈天

望聖激切屏營之至

再乞致仕

臣今月初七日具奏乞罷御史中丞許臣守本官致仕  
伏奉詔書未蒙俞允臣無任惶恐戰越之至臣衰朽不  
才謬當言責日久涓塵無補媿負實深式陳懇悃之辭  
冒瀆高明之聽敢意天慈未忍棄捐賜之溫詔令姑安  
職臣之庸鄙顧何以稱此仰體眷私殞身曷報重念臣  
年齡垂暮願歸田里非適今日昨為郡守布宣德澤庶

非素餐已嘗援引禮經叩闈有請今又二年矣齒髮日益凋殘心志日益衰謝而况中丞之職實任耳目之寄凡羣臣之不循法度與事庶之不協於理者必能周知徧察以復於陛下豈容癯老昏懦之人久充此位而已邪是以不避誅殛輒控告於君父乞賜罷免並非卒然欲要勇退之虛譽也實以責任之重非所堪任區區之情可亮伏望聖慈曲垂矜察特賜依臣前奏所乞施行臣無任祈天望聖激切屏營之至

工部尚書乞致仕

臣竊惟戒之在得仲尼之明訓知止不殆老氏之格言  
臣塵忝科第叨竊祿食三十有五年矣庸陋不才曾無  
毫髮補報公家今也精力疲癯志慮昏塞益覺無堪所  
宜免官謝事退歸田里之時而乃貪戀寵榮冒居華要  
久而不去雖陛下於臣覆之如天容之如地未忍棄逐  
然在臣之進退去就義當如何兼臣近得足疾發歇不  
時深慮朝謁顛仆失儀取笑士類前日燕殿奏對已嘗

披露愚悃冒瀆聖聰伏蒙矜憐曲賜訓誨碎臣之身何足論報重念臣區區犬馬慕戀之情豈願違去軒墀願臣智識短淺初非可用之才更令久於朝廷終恐尸素曠敗積有愆尤負先聖賢之戒訓上累陛下知人之明此臣所以日夜愧懼不遑寧處伏望聖慈矜哀特賜處分檢會臣前後陳乞章奏許臣罷職守本官致仕臣無任祈望激切之至

再乞致仕



臣今月初一日具奏乞檢會臣前後章奏許臣罷職守本官致仕伏蒙降詔不允臣上感聖恩惶懼戰越殆無所容然臣初非敢飾說煩瀆聰聽實以氣血衰殘心志凋謝鞭策不前惟是投閒乃愚分之所安是以不得已仰冀陛下推天地父母之心赦其萬死容畢其說重念臣近嬰足疾未獲全安政於趨朝有妨宜去一也近來覺多昏忘深慮職事曠廢宜去二也辱在論思之地不為不久曾無毫髮之補宜去三也日者薦舉失當雖蒙

恩赦罪於義難安宜去四也賢俊滿朝而獨以癘老無  
用支離於其間塵垢華塗宜去五也頽齡至此若更貪  
慕無厭夜行不輟必招顛覆之災宜去六也區區輒復  
披露愚悃干冒天威伏望聖慈曲加矜察特賜依臣所  
乞施行

提舉亳州明道宮乞致仕

竊以物生天地之間壯無不老道在君臣之際始則有  
終故禮經著致仕之年而先聖垂戒得之訓事關廉恥

義敢因循中謝伏念臣蓬華寒生箕裘末緒濫綴崇寧  
之黃甲亦既有年叨聯紹興之清班於茲積歲初為代  
耕而干祿不圖逾分而冒榮每期頂踵之捐終蔑涓塵  
之補今則桑榆景暮犬馬齒衰雖自古盛王未有遺年  
然類彼老人馬能恤遠鐘鳴漏盡適驚田豫之心岩居  
川觀奚待網成之諷頃者屢貢乞骸之悃輒蒙賜詔之  
恩深體至仁姑存舊物念坐縻於廩餼重負愧於心顏  
矧虛羸而長困於河魚昏憤而或聞於牀蟻形神俱弊

溝壑是虞伏望皇帝陛下軫父母之慈垂日月之照曲  
矜衰朽理合退休恕其孤大恩而莫酬聽其辭素餐而  
告老庶循愚分亦便鄙私既無

缺



高峯文集卷七

欽定四庫全書

集部

高峯文集卷八

九

詳校官庶吉士臣李如筠

主事臣呂雲棟覆勘

總校官庶吉士臣何思鈞

校對官中書臣王家賓

謄錄監生臣陳炳

欽定四庫全書

高峯文集卷八

宋 廖剛 撰

啓

賀交代劉教授

伏審茂膺宸命榮拜儒師偶稱慶之未遑遽移書之先  
辱謙光有暉媿汗欲流恭惟某官異稟天麟希珍廟璉  
英躔高步曾却敵于萬人仙籍巍登俄飛聲於四海惟  
妙學足以發明典惟卓行足以振起頽風故朝廷爲

官擇人輟北門之上幕而庠序量材授職汰東郭之濫  
竽偉哉道將興歟聞之誰不喜者况某望風有素仰德  
惟深覲睟表以非遙聆好音而增慰具爲感忭莫可敷  
陳

謝知府舉狀

義不苟求素存心於分定才非可錄敢有意於已知人  
固疑其不情獨甚安於無事採封誤及舍瑟俄驚切以  
知人自古所難薦賢報國之事好已諛者或弃藥籠中



物持衆見者必先長者家兒倘非以人物爲心何以逮  
寒素之士如某者零丁落譜欵啓謏聞頗尋先哲之微  
言粗識古人之大致愚惟委命拙昧干時固無取於匠  
氏斤斧之餘遂自弃於化工爐冶之外折腰以爲五斗  
所無憾焉仰首而效一鳴非其志也豈謂公忠之哲鑑  
亦憐捐僻之孤蹤爲其不能枉尋欲使得以進寸頑非  
木石銘在肺肝此蓋伏遇知府檢討先生樂育英才思  
皇多士竹頭木屑廣爲暇日之儲馬渤牛溲要備異時

之用致容駕鈍獲玷甄收某敢不益尊所聞每鞭其後  
預榮登俊游激浪之龍門妄意飛英附追風之驥尾假  
令屨滿於戶外尚期穎脫於囊中東郭食浮頻頻多媿  
西山氣爽耿耿徒存倘或粗見於施爲庶幾少酬於知  
遇

謝崔祕校

尚德名 适秀州人  
大學號爲崔書厨

伏審賜對楓庭登榮桂籍凡屬知游之舊舉深慰抃之  
情恭惟新恩祕省閣下擅價儒林著名經笥皂櫪久淹

於高步青雲俄挹於魏科行看識擢於當途式展經綸  
之素蘊某叨聯友未倍劇忻悰曾馳慶之未遑辱飛牋  
之先及其爲悚感莫可敷陳

賀交代

沈儀曹  
字宋師

伏審祇奉宸恩勉從吏事將有交承之幸曷勝慶忭之  
私恭惟某官廟璉瑰竒天驥超絕妙學早臻於奧境高  
風綽著于休聲詩禮過庭式謹移忠之訓父母去國初  
無願事之心顧棘針豈鸞鳳所栖然駢角在山川其舍

某講聞惟舊景慕實深覲睟表以非遙聆好音而增慰

謝舉改官

白尚書  
張侍郎

芹水備員初乏不龜之技龍門登俊慙非中鵠之賓何  
圖封體之靡遺遽辱袞褒之濫及恩來望外感劇懦衷  
切以知己自古所難進身適今非易俊又如雲而干求  
請托復甚於趨市公卿如水而校量題品不啻於持衡  
倘非遠識猶以人物淹滯爲心安得公舉下逮湖海寒  
瑣之士如某者零丁落譜款啓謏聞頗尋先哲之微言

粗識君子之大致愚惟命委拙昧身營固無取於匠氏  
斤斧之餘遂自棄於化工鑪冶之外折腰以爲五斗所  
無憾焉仰首而效一鳴非其志也敢意高明之過聽特  
矜狷僻之無能不須堂下之言亟謂籠中之物頑非木  
石銘在肺肝此蓋伏遇某官廊廟著龜縉紳標的包荒  
之量靡間邇遐勤物之心無分小大豈但措民風於軌  
範舉將器士類於陶甄雞壘豕零要備不時之用竹頭  
木屑廣爲暇日之儲是令孱庸亦預採拂某敢不銘心

特捺跣踵清規弊帚千金既辱收於洒掃駑馬十駕誓  
不憚于馳驅倘粗免于過愆庶不辜於知遇

謝張憲舉改官

義不苟求素無慙於自守才非可用敢有覬於或知人  
固謂其不情獨甚安於無事采封誤及舍瑟俄驚切以  
大人之學所以美身君子之仕惡不由道富若貧曷嘗  
汲汲知與否莫不囂囂萬鍾於我何加三公不易其介  
茲古人守身之大致豈儒生夸俗之常談世道莫興悵

高風之絃斷行言靡顧嗟末學之波流祿則重而道輕  
利顧先而義後千駟繫馬寧求耕野之人五乘得車不  
無砥滄之客鄉黨自好者之所竊笑人物爲意者將焉  
取斯宜有高明振茲委弊謂舉直乃能使直顧不爲故  
可有爲公道倘行清議惟允如某者生身窮左賦性介  
愚早從庠序之遊粗獲師友之益于以夙興而夜寐不  
知日往而月來自冠及彊去庭幃者殆四千里由長至  
錄掌規矩者凡十五年潦倒麓疎已不堪欽歎歷落祇

可笑逮綴名於黃甲僅脫籍於白丁周室備官首訪西  
雖之鷺魯宮庀職濫搽東郭之筭獲玩意於典墳整辭  
勞於簿領坐糜祿廩虛閱歲華平日交遊半在雲霄之  
上盛時冗散分遺江海之濱錄錄雖無他長綽綽似有  
餘裕但知非公事不至偃室豈爲諸君子而與驩言寧  
爲東國之屈臣不負西山之爽氣昂霄有路翱翔已失  
於黑頭推轂無人蹭蹬更甘於白足敢謂公忠之哲鑑  
亦憐狷僻之孤蹤初無堂下之言遽作籠中之物此蓋



伏遇某官性天虛靜德宇恢宏未嘗小忽于寒微皆欲  
力振其淹滯致茲椎魯亦預甄收敢不益尊所聞每鞭  
其後預榮登俊遊激浪之龍門妄意飛英附追風之驥  
尾假令屢滿于戶外尚期穎脫於囊中位卑言高諂  
豈敢人微志大耿耿徒存倘或粗見於施爲庶幾少酬  
於知遇

謝白右丞舉改官

強顏五斗分甘雞鶩之羣通籍九重濫廁鵷鴻之列揣

躬知幸歸德深深竊以特達之知搢紳所重保任之法  
朝廷尤嚴雖後進未免乎因人而當塗每難於薦士矧  
賦安之糞朽初絕意於雲天一朝被飾於青黃百鍊實  
慙於爐冶此蓋伏遇右丞先生德茂伊呂望隆臯夔道  
善道而一物不遺言所加而千金非重猥以登俊振淹  
之薦墨施於不才寡與之鄙夫增倍價於鹽車發歡顏  
於廣廈雨露之施固不自以爲德邱山之賜孰能獨忘  
其情某敢不仰佩至恩竊遵懿矩泮厲厚办激昂竊顧

非類於不食之匏敢自後于能鳴之鴈翱翔霄漢倘難  
混于凡鱗竭盡筋骸尚不迷於夸路永言庇類正在陶  
鈞

謝陳劉二司業

強顏五斗未殫犬馬之勞通籍九重濫廁鵷鴻之列揣  
躬知幸歸德深深竊以薦舉之法朝廷至公特達之知  
縉紳所重矧賦姿糞朽初絕意於青黃之飾而委命鑪  
錘曾不善于踴躍之詞一朝回暖于郗春衆目實慙于

褚鑒此蓋伏遇司業先生道成善貸內恕兼容未嘗求  
備於一夫雅欲大庇於寒士是令孱冗叨預甄陞萬里  
飛騰雖媿青雲之士友一生竒蹇聊寬白屋之庭闈某  
敢不同上 永言依庇更賴始終

答何狀元

竊審臚傳初下巍級先登朝慶得人士歆出類伏惟狀  
元學士先輩揄楠擢秀奎璧含章才名方藉于時評說  
論果傾于天聽無雙妙技共看申括之竒功絕玷希珍

獨擅連城之高價雖盛美皆知其爲國瑞而快覩獨幸  
先於衆人權抃曷勝餘榮所被尚訥詞之稽致遽謙翰  
之猥蒙感忤并深敷陳因既

興化軍到任謝監司

茲者被命嚴宸分符屬郡雖云僥倖蓋自品題恭惟某  
官挺特世英瑰竒人傑擎天柱石濟國舟航以才猷結  
主知于九重以政事慰民瞻于一路遙知天闕已虛玉  
笋之班暫駐星軺猶作繡衣之使某忠雖衛上才不過

人頃由六察之備員今假一麾而出守養親有便報國  
無功惟茲曠責之逃尤賴庇庥之及厥爲欣幸實倍等  
夷

又謝寄居

誤膺宸檢叨守郡符顧綿力以奚堪劇懦衷而增媿伏  
惟某官稟天秀氣爲時英材蘊康濟之嘉謨負經綸之  
遠業韜光間宴頗聞爭息于里閭振翼清華將見澤加  
于寰寓某偶緣承乏遂獲依仁曾修牘之未遑辱騰箋

之先及其爲感媿曷究敷宣

賀知福州劉延康禮上

伏審分符嚴陞開府雄藩總一道之兵戎寬九重之宵  
旰輿情胥慶士論交歸恭以某官廟璉希珍天驥絕足  
早簡知于中展薦揚歷于華塗資文武之全才視功名  
之餘事元侯作屏李公固賢于長城畫錦生輝季子暫  
還于故里山川壯觀以增氣父老歡呼而預榮矧茲陋  
邦實連洽壤露分美化賴靈海之餘波景仰老成况高

山之在目顧惟孱鄙但竊傾依更祈葆練之精式副倚  
毗之重

謝陸中丞

某官廊廟羽儀縉紳標準一德愛君而憂國平時揚善  
而推賢雅憐湖海之孤蹤曲借齒牙之餘潤是令孱瑣  
不遂廢捐壁水充員初類濫吹之東郭霜臺備屬更慙  
不簋之南箕迺因就養以祈天復玷疏榮而有土付以  
可封之俗守此不刊之書顧僥倖之良多雖糜捐而曷



報回瞻帝日悵玉陛之何遙仰庇卿雲幸龍門之在望  
尚靳苟免不負素知銘佩所深敷宣罔既

賀諸監司正

王正謹律歲序聿新與國同休屬時巨哲恭惟某官道  
窺天運德進日休序布三陽茂對始和之吉類并五福  
坐迎交泰之祥獲多祐于神明增殊榮于祿位某限司  
城鑰阻詣臺閣鄰郡云限守偏壘阻詣崇墉慶頌之誠敷宣罔既

賀諸司屬官鄰郡通判正

四序星周三陽卦布天元資始賢德攸宜恭惟某官業履高明才猷敏邵道與時而俱泰福緣類以潛升某限

守土疆阻趨賓廡屬在庇庥之下良深慶頌之情

惟是傾依

之素良深慶頌之私鄰郡通判云上二句

### 賀廉訪

伏審廉訪直殿肅膺宸檢榮領使權將德意于九重騰歡聲于一道伏惟慶慰恭以某官圭璋粹質金石純誠懷仁義以事君嘉謀猷而告后選擇而使無如父子之

賢精白以承將見功名之大某忝職屬部傾心高風覲  
粹表以未諧望崇墉而竊抃

賀提刑起復

伏審寵膺綸渥起復使權騰一道之歡聲見九重之異  
眷諒安大義深抑至情恭以某官忠蓋得君才猷濟世  
屢易光華之節亟收竒偉之功千里淮壖坐弭荏蒲之  
警八州閩部迄無唇齒之虞顧聞望之甚隆宜倚毗之  
益重不容終制果責移忠蓋欽恤是圖必資於有德而

平反已效久號於無寃正賴寬宥旰之憂且亦釋部屬  
之憾願言晦養不廢澄清惟一視於國家實兩全於臣  
子

賀廉訪起復

伏審茂膺天渥復領使權實資將命之才遂起倚廬之  
制事光新典眷出宸衷恭惟某官絕識超人清忠許國  
風猷挺特德宇粹融九重親對於冕旒千里載馳於斧  
繡春陽及物秋隼擊姦休聲果達於赤墀聖語亟頒於

丹詔恩來北闕歡  
泱南州蓋由間出之資  
宜被非常之寵  
矧忠孝本同道而臣子亦一心  
諒傾向日之誠少抑  
悲風之念

賀知福州柳侍郎禮上

伏審拜恩寵命開府剛辰總一道之兵戎寬九重之宵  
旰恭惟某官學臻道奧識洞機先為廊廟之羽儀實縉  
紳之標的依光從橐藹問譽于華塗均逸侯籓聳觀瞻  
于遐服輿頌佇聞于五袴列城爭仰于二天矧此隘封

密連治壤露分美化賴靈海之餘波景仰老成幸高山  
之在目莫遂望塵之謁徒深賀厦之情

賀提刑

伏審拜恩北闕擁節南州士論交孚輿情胥慶恭惟提  
刑舍人宏才拔萃奧學通微蚤馳譽于英躔旋據津于  
要路精忠許國厚德鎮浮直筆罔均曾侍玉皇之香案  
剖符魚左坐收赤子于潢池果膺妙選于公朝暫按祥  
刑于遠服將見有司之不犯豈惟庶獄之無冤某幸托

幘幪實深抃蹈尚阻趨于屏著徒引望于旌麾

答明守郭太尉

伏審光奉明綸榮陞亞傳凡在觀瞻之列舉深懽抃之情伏以制置少傅高範儀時遠猷經國聊綰菟符而作鎮坐令鯨海以無波簡在宸衷召還天陛特善龍韜之對載更虎節之隆未遑慶幅之修先辱華牋之貺其為悚感曷勝叙陳

答江守程待制

伏審拜恩明綽易鎮上流聯次對之清班膺維藩之重  
寄諒惟慶慰伏以安撫待制天驥絕足廟理希珍高誼  
薄于雲天威名被于草木是畀江山之要地庶觀韜畧  
之奇勲曾慶幅之未脩遽謙詞之先辱其為感悚曷勝  
叙陳

答馬寺丞諸官

立朝无補理合投閑扣闈有陳遽叨假守方深懷歉敢  
以為榮不圖謙德之隆先辱長箋之貺啓緘伏讀慙褒



借之非宜望風馳情喜披承之伊邇顧惟感佩未易敷

陳

漳州到任謝兩府

頃緣衰疾控告朝廷猥被寵光濫分符竹因許過家而  
上冢不妨便道以之官身雖在于遐陬名實聯于禁掖  
載惟僥冒第劇兢凌重念某粵自効官初惟苟錄固知  
糞朽青黃何意于犧樽不謂風波萋菲幾成于貝錦賴  
皇明之下燭俾孤迹之更榮起之于罪戾之餘振之以

清華之貫春回寒谷誰爲吹律之人望去鼻端厥有運斤之手此蓋伏遇都督僕射相公載物德厚回天力

闕

謀猷壯而國勢以強清濁分而人才斯得顧如空鄙亦預選掄惟是漳濱實窮閩境其民樸野而獄訟素簡其地僻左而賓客少過竊此便安將何報稱某敢不本中和以布教審思數以宜民期無負于承宣庶可酬于知遇鳧飛雖遠詎妨渤澥之春鴛鴦已疲徒結軒墀之戀未填溝壑尚託陶埏

謝監司到任

頃緣衰疾控告朝廷初覬投閑竊食祠宮之祿猥蒙疏  
寵叨分便郡之符茲用涓辰已諧視事荷厚恩于山岳  
懷深懼于淵冰重念某晬晚餘齡空疎朽質載惟職守  
正有賴于旃濛尚幸仁私曲加憐于駑鈍

賀范運使禮上

伏審光膺宸檢榮領使權士論交孚部屬胥慶伏以運  
判吏部風期俊邁業履清脩蘊經濟之長才掀方騰于

夷路粉闈推擇霜節光華蓋聖朝務加惠于疲民故漕  
政尤尚賢于吉士裕民足國肯効獲十禽于終朝賞善  
旌能將見遷九官于一歲某備員下邑托庇深仁迎大  
旆以未諧聆好音而增抃

賀知泉州劉寶學

伏審寵陞法從出鎮名藩錦衣方慶于歸榮竹馬已歌  
于來暮歡騰千里光動四隣恭以知府侍郎直道事君  
遠猷經國寇攘所過賴撫鄂侯之封壽榮是資復入晉

公之幕茲徇邪帷而均逸暫令遠俗之蒙仁惟聞譽之  
益休知功名之未艾某叨分支郡竊庇下風望崇屏以  
非遙仰英標而徒切

答南劍陳通判

伏以題輿千里幸桑梓之獲依守鑰一方恨江山之猶  
阻何圖謙德不鄙陳人枉鄭重之緘封被光輝於衰朽  
永言感戴曷罄叙陳

賀陸敦禮知福州

伏審寵膺三錫部刺八州絲綸薦賁于邱園貌虎悉歸

于節越竊惟慶慰恭以某官淵騫術業夔契忠嘉

初云器資

廊廟望重縉紳啓沃聖主之心緝熙賢王之學

曾作諸王翊善

海濱寄

傲寧忘魏闕之坐馳候屏疏封爰倚漢卿之卧治家山  
壯觀以增氣父老歡呼而預榮矧此陋邦實連治境餘  
波沾潤慶靈海之非遙懿範儀刑幸高山之在望依仁  
有素賴庇盖多徒深燕雀之情阻從賓客之後

謝錢侍郎

伏審恩新帝綉光動里門復次對之清班仍奉祠于  
仙館諒惟慶慰恭以宮使待制侍郎業履高明風期俊  
邁踐華途而畧遍藹令聞以彌芳眷注方隆褒遷茲始  
曾未遑于馳慶俄先辱以飛緘悚感至深敷陳奚既

答李似表除正字

伏審光奉綸言榮登芸閣賞蓬瀛于陸海映奎壁于英  
躔輿論交孚香名益播恭以密省新恩學士楩楠擢秀  
珪璧含章霜蹄方騁于康莊雲翮漸凌于霄漢公朝得

士曾慶幅之未脩謙德下人遽寵戕之先辱載惟涼鄙  
第劇感慙

答發運湯侍郎

伏審光被殊恩榮膺重寄奉十行之詔札總六路之漕  
權舊德是圖僉評惟允恭惟某官才猷高邁聞譽四馳  
素簡在于淵衷暫分憂于邦計錢流地上佇觀經畫之  
優虜在目中更賴轉輸之敏趨風尚阻仰德方深謂為  
祁寒善調茵鼎



賀施提刑

伏審光膺明命出按祥刑使節初臨部封胥慶榮以提  
刑正言天驥絕足廟璉希珍忠嘉嘗著于諫垣志節雅  
推于士論淵衷簡在華貫踐揚敢圖僻陋之遐方獲見  
老成之舊德金科玉律暫分欽恤之憂雞首鳳池竚被  
褒遷之寵某依仁有素托庇方深喜躍之私敷陳奚既

賀泉州趙侍郎

伏審光膺明命易鎮大邦輟黃門侍從之聯付畫戟藩

宣之寄歡騰千里光動四隣伏惟慶慰恭以知府待制  
直道事君遠猷經國夙著獨行之操咸推難進之高議  
論醇乎古人備四時之正氣典章出乎大手柄三代以  
同風起自祠庭還歸省闈俄分憂于南服仍寓直于西  
清譽望益隆倚毗滋重某叨分支郡竊庇下風望宗屏  
以非遙仰英標而徒切其如詠頌曷罄敷陳

賀運使鄭吏部

伏審光奉綸恩出司漕計邸音遠播邁周雅之光華舊

部重臨增召南之蔽芾庇庥所逮懼抃惟均恭以運使  
吏部逸驥英姿天球萃德夙蘊經綸之妙薦更委寄之  
繁攬轡登車豈止藉澄清于一道裕民足國抑將資豐  
羨于九年眷注持隆倚毗益重某托蹤惟舊沐德良深  
望森戟以誠馳阻崇墉之慶謁薰風屆候坦履集祥善  
保天和式慰輿頌

賀安撫折樞密

伏審拜寵嚴宸偃藩巨鎮安危夙注時高將相之材文

武兼資任重兵民之寄風猷所暨抃蹈攸均恭以判府  
安撫樞密學際天人智周事物有可大之賢業以自結  
于主知屬圖帝載之熙進位樞庭之峻淵衷簡在賴密  
贊于明謨直館久閑豈不懷于舊德肆頒恩綍用付帥  
權矧此閩區寔鄰江國元戎十乘暫淹巖石之瞻泰階  
六符行趣介圭之覲某叨分屬郡竊映餘光望檠戟以  
誠馳阻門闌之慶謁其爲欣幸曷勝敷陳

賀提刑宋少卿

伏審光膺寵命出按祥刑旌旆初臨部屬胥慶伏惟提  
刑少卿才猷挺特業履清高問望甚休中外所仰暫輟  
月卿之重遠揚星使之華舜德好生期致有司之不犯  
呂刑克允率由折獄之惟良佇觀平反之功不負澄清  
之志某叨紆郡紱阻造賓闕托仁庇以方深仰英標而  
徒切顧言調嗇式副倚庇

賀發運程待制

伏審光被殊恩顯膺寵命奉十行之詔札總六路之漕

權令望素孚僉評惟允恭惟發運待制天驥絕足廟璉  
希珍夙簡在于淵衷屬惟新于墜典倚圖邦計資佐國  
君眷茲悠遠之山川孰匪光華之原隰錢流地上佇觀  
經畫之優敵在目中正賴轉輸之敏某趨風尚阻庇德  
方深仰祈葆練之精式副倚毗之重

答汪相公

頃緣哀疾丐就便安悵去國之三年濫承流于十里撫  
民雖切報政蔑聞剡牘由衷方露乞骸之請賜環自遠

遽叨專席之除辭榮莫遂于循牆借譽良由于推轂恭  
惟判府觀文相公三朝柱石九廟著龜江湖而魏闕遊  
心夢想以人物為意登門最後亟蒙國士之知報德何  
先願效王臣之蹇固當希鸞鳳而小橫秋之鷹隼敢不  
置狐狸而去當道之豺狼倘無負于使令庶不孤于期  
待

答明州知府潘舍人

伏審光膺明命往殿大邦聯西清鷓鷯之行荷東土兵

民之寄風聲所暨贊頌惟均恭以知府舍人待制直道  
事君遠猷經國夙著獨行之操咸推難進之高議論醇  
乎古人備四時之正氣典章出乎大手炳三代以同風  
爰起祠庭暫為民牧某睽違歲久瞻仰日勤望崇屏以  
榮迷想英標而心醉

答宣撫胡大學世將

頃緣衰疾覲就便安剡牘由衷方露乞骸之請賜環自  
遠遽叨專席之除載惟辱陋之亡堪良由推挽之有素



恭以宣撫大學士天驥絕足廟璉希珍高明而故舊不  
遺夢想以人物為意遠寄五雲之翰墨欲鞭十駕之駑  
疲某敢不被服王言激昂晚節晞鸞鳳而小橫秋之鷹  
隼置狐狸而去當道之豺狼倘無負于使令庶不孤于  
期待

答邵五王舍人

伏審解印螺川易麾鳥嶺新政遽歌于來暮舊邦應結  
于去思盛德所臨嘉聲亟播伏惟慶慰恭以知郡舍人

球琳寶器韶濩純音頃接武于禁途實擅名于詞掖偶  
辭持橐暫巧分符曾不鄙夷乎遠名已見薰陶于美化  
固知君子之所養隨遇而安自得百姓之懽心不嚴而  
治某屏居鄰壤竊庇下風未遑問牘之脩先辱寵緘之  
貺第深媿荷曷勝敷陳

答洪州梁安撫

伏審拜恩明綉易鎮明都素望重以逾榮衆正孚而胥  
悅伏惟慶慰恭以知府安撫閣學正議天驥絕足廟璉

希珍貂蟬奕世於榮途棣萼聯芳于俊域屬列侯之建  
長當聖主之親賢爲其腹心之臣付以肱股之郡十連  
有帥實爲縉紳之表儀四國于蕃用寬朝廷之憂顧某  
屏居遐陋竊慕風猷未遑慶牘之馳先辱華緘之賜第  
深媿荷莫罄敷陳

高峯文集卷八

欽定四庫全書

高峯文集卷九

宋 廖剛 撰

啓 簡附

代謝宰執

便私請郡賜允蒙恩視事云初撫躬增惕竊以加禾善地吳會名邦魚鹽秔稻之富饒井邑棟甍之赫麗雲連中泐餘二陸之流風水接淞江想三高之遺迹舟車衝翳商賈阜通乃無獄訟期會之煩不廢樽俎笑談之樂

矧遂綵衣之奉更叨麟閣之榮澤雖沛于中天雲寶興  
于四嶽此蓋伏遇某官持衡公道提掖儒流協一德以  
交脩器羣材而並用致茲庸瑣借冒寵榮敢不夙夜懋  
功上贊陶鈞之化永霜勵節仰酬濬拂之私

代謝諸監司

茲者誤膺宸檢叨領郡符蒞事云初撫躬增愧恭惟某  
官玉壺清質金節重權抱古人之三長而才最高兼使  
者之四德而仁為首敢鄙孤迹得請屬封顧千里之寄

非輕惟二天之庇是賴旌麾在望未容履舄之親訓約  
素嚴敢怠規繩之守涼風初肅迅召非遙善保天和式  
慰輿頌

代謝走馬

某官公忠茂著節義藹聞持天憲于一方採民謠于萬  
里敢圖孤迹得請屬封托巨庇以方深仰高風而彌切  
江山爲阻趨履舄以未遑繡斧所臨徒淵冰而懷懼旻  
秋戎肅泰宇育和更冀保綏式慰瞻頌

代謝龐帥

某官英才瑞世高範儀時屏翰一方帥帥列辟有可大  
之賢業以自結于主知聯榮內閣之清班增重東吳之  
巨鎮敢圖瑣質偶遂私心竊守下邦密連治壤露分美  
化賴靈海之餘波景仰老成况高山之在目茲為厚幸  
足庇狐蹤徒祇畏于簡書阻經趨于旌棨西湖風月暫  
留醉于融樽北闕鵷鷺諒行趨于舜陛高秋戎肅良覲  
未諧仰惟調鍊之精式副倚毗之重



代謝揚州判府太尉

恭惟某官著龜舊德柱石元勳惟周之均民固被其膏  
澤若孔之卓天未絕於斯文睿眷特隆士流永重孰不  
願借齒牙之論固當皆在鑪錘之間致茲椎駑亦沐輝  
潤

代謝判府中書

某官主張吾道提掖士流王室藩維式重玉符之寄帝  
心簡在佇隆巖石之瞻顧惟椎駑實沐輝潤

代謝宮使林顯謨

某官爽邦著哲命世大儒文章學者之宗師行業士流之矜式孰不願借齒牙之論固當皆在鑪錘之間自惟

懦庸寔出提拂

蔡攸顯謨何志同龍圖云道學命世公忠得君藹然聞譽之施于身卓爾謀猷

之告于后

代賀李漕加職

伏審光被殊恩榮遷峻職凡在庇休之下舉深忭蹈之情恭惟某官清廟希珍巖廊重器早膺妙選薦歷華塗

茂碩德之公忠藹邇才之強敏錢流地上知四賦之善  
經名落人間寧三載而徐陟繫寵光之載錫謀眷遇之  
彌隆要任所階僉評惟允某側聞加命良劇懼悚望旌  
榮以誠馳阻門闌之慶謁

代賀常平鄧提舉

光膺睿渥榮擢使華接廉之初部屬交慶恭惟某官天  
麟異稟廟璉希珍香名籍籍於縉紳高步駸於霄漢  
惟鰥孤寡獨之政若開闔斂散之權委寄匪輕選擇故

妙某托庇茲始望風實勞覲粹表以非遙振懦衷而增  
抃

代賀提舉曾察院

某官學窮性命之原道識文武之大橫經壁水蔚爲儒  
者之宗師執法烏臺久著正臣之風永惟郡國之敷教  
屬明聖之留神

代賀提舉常平齊博士

光膺睿渥就易使權旌旆初臨部屬交慶恭惟某官風

期俊邁進止詳華韜命世之才猷抱濟時之器識傳  
經東序蔚為儒宗敷教南閩休有士譽某望風有素覲  
德未諧託巨庇以方深振懦衷而增抃

代賀監司郡守冬至

魯雲紀瑞周歷頌元氣應卦以潛升道法天而俱運恭  
惟某官學趨賢聖行通神明望重朝廷寄崇方面

發運  
云職

隆師  
帥

茂對履長之序允為逢吉之期佇被褒書益躋要

路某限居官次阻造門庭

發運云阻  
伏旌麾

祈頌所深敷宣罔

既

又

魯雲占瑞堯日迎長當陽類之潛升宜吉德之昭慶恭  
惟某官玉壺清質金節重權方欽時以亮功益宜民而  
受祿某限守城鑰阻造門闡望旌榮以非遙奉醪觴而  
莫及永言祈頌曷既敷陳

又

日行北陸雲瑞西郊初陽應候於黃鍾亞歲盛儀於紫

禁恭惟某官允迪吉德茂對嘉辰惟事君之盡忠當宜  
民而受祿某限守符竹阻慶門闌祝頌之情敷宣罔既

代賀鄰州通判

晴雲昭瑞化日迎長一陽當復吉之初萬彙訝泰亨之  
漸恭惟某官夙躬令德茂對嘉辰方欽時以亮功益宜

民而受祿

下同  
前篇

代賀新通判

伏審光被殊恩榮拜新命將有親依之幸曷勝抃蹈之

情伏惟某官廟璉瑰竒天驥超絕幸逢華旦茂展嘉猷  
徹淵聽于九重播香名于四海陳仲舉豈衆人比請為  
題輿龐士元非百里才宜升別駕鴻飛陸漸鵬從風搏  
輿望交忻僉評惟允某間關竒迹腕晚餘年方深瘝曠  
之憂迺獲明哲之助其為慶慰莫可敷陳

代通判賀交代

伏審光膺宸綽爰駕屏星當獲賢者之交承曷勝鄙心  
之榮幸恭惟某官天麟殊稟廟璉希珍素韜經世之才



猷茂著濟時之職業英聲籍甚士望翕然故朝廷為官  
擇人擢西門之異績而州郡量能授職斥東郭之濫吹  
輿論適平榮途載始某聞風惟舊僚德寔勤覲粹表以  
非遙震懦衷而增抃尚祈葆鍊式慰願言

代賀徐發運啓

伏審光被殊恩總司大計下九重之溫詔騰六路之懽  
聲凡在庇庥孰不抃蹈恭惟制置發運學士英姿粹氣  
稟于天然博識宏才周于世用薦更使事皆出上知攬

轡登車豈止藉澄清于一道飛芻輓粟抑將資豐羨于  
九年眷注特隆倚毗益重某托蹤惟舊沐德良深望森  
戟以誠馳阻崇墉之慶謁涼飈戎肅坦履集祥善保天  
和式慰輿頌

代賀提轄加團練啓

伏審肅膺殊眷榮拜新恩增使節之光華極輿情之懽  
抃恭惟某官珪璋粹質金石純誠懷仁義以事君嘉謀  
猷而告后選擇而使故當不後于衆人精白以承果見

特優於寵數某側聞褒詔竊劇忻悰望旌榮以非遙尚  
門闌之阻慶

代賀杭州知府李待制禮上

伏審拜恩寵綍開府剛辰聯榮內閣之清班增重東吳  
之巨鎮恭惟某官遠猷經國高範儀時方聖主之急賢  
屬大邦之建長不容終制遽責移忠九賦飛輪靡見頓  
芒於恢刃三農坐阜佇開載路之懽謠某假守隘封密  
連治壤露分美化賴靈海之餘波景仰老成況高山之

在目茲爲厚幸竊震懦衷悵旌榮之非遙阻闌門之前  
慶西湖風月暫留醉于融樽北闕鵷鷺諒行趨于舜陛  
新霜在候坦履集祥更祈葆練之精式副倚毗之重

代賀諸監司鄰郡正

王正謹始歲事聿新與國同休屬時巨哲恭惟某官遠  
猷經國高範儀時夙夜惟寅盡君子事天之道中和樂  
職抑古人求福之方茲順履于嘉辰宜倍膺于殊祉某  
限守城鑰阻奉壽觴

鄰郡作阻  
造賓閱

慶頌之誠敷宣罔既

代賀徐發運知杭州

伏審拜命恩綸易壇巨鎮仍涉圖書之法從不離綉斧  
之提封凡在庇庥孰不忭蹈恭惟某官朝廷重器縉紳  
名流識洞幾先智周物表屢光華于使節輒豐衍于邦  
儲初若運之掌中如見流于地上乃言可績所至有稱  
猶利刃常恢恢乎有餘譬善戰雖多多而益辦精忠上  
達一飛果致于青雲溫詔亟頒三接遂躋于丹地屬此  
大邦之建長况當聖主之親賢謂其腹心之臣付以股

肱之郡自昔湖山之美聊慰去思佇聞襦袴之謠共歌  
來暮第恐赴功名之會矧方遭眷遇之隆旋即賜環不  
容暖席某久托蹤于治部行竊照于善鄰聞大旆之將  
臨覺愚衷之增快更祈保衛式副傾依

代賀應運使除發運

伏審光被殊恩總司大計下九重之溫詔騰六路之懽  
聲凡在庇庥孰不慶慰恭惟制置發運學士英姿粹氣  
稟于天然博識宏才周于世用薦更刺部連上最書繫

彼東南之區是惟山海之藏提封幾乎千里經賦半于  
九垓倘非當才孰將倚辦惟忠純之節藉甚縉紳之間  
而仁義之餘歸于理財之策豈止藉轉輸于一道抑將  
資豐羨于九年眷注特隆倚毗益重某假符有守贊慶  
未遑迎大旆以非遙在鄙懷而增抃

代賀劉運判陞運副

伏審光膺宸檢榮陟使權命下九重懽騰一道恭惟某  
官風期俊邁進止詳華茂碩德之公忠藹通才之強敏

裕民足國不勞四賦之經定分正名寧俟三載之陟繫  
龍光之遽被亦善最之亟聞睿眷特隆榮途伊始某依  
仁有幸托庇方深望森戟以非遙阻崇墉之前慶其為  
忻忭實倍等倫

代賀王郎中除運判

伏審光膺宸檢榮領漕權士論交孚部屬胥慶恭惟某  
官才猷敏邵業履高明動淵聽于九重播香名于四海  
粉闈推耀畫繡言還亟聞鎮撫之賢遽被光華之選裕



民足國肯效獲十禽于終朝賞善旌能將見遷九官于一歲某依仁有素托庇方深迎大旆以未諧聆好音而增抃

代賀新提舉常平

伏審恩新帝綍光動使星籍甚梁楚之聲懽騰吳越之境伏惟慶慰恭以某官絕足天驥無瑕世珍方凌厲于九霄暫光華于四牡惟鰥寡孤獨之政允屬仁人矧開闔斂散之權更資達識某假守治部傾心下風永言依

賴之深竊幸趨承之適

代賀杭州徐待制禮上

伏審易壇重鎮開府剛辰光輝昔日之湖山鼓舞平時  
之部屬伏惟慶慰恭以某官才猷濟世忠蓋得君九賦  
飛翰靡見頓芒于恢办三農坐阜佇聞載路之懽謠某  
假守隘封密連治壤依仁有幸竊照益多徒深燕雀之  
誠阻從賓客之後

代荅致仕朱承事

簿書銷日長慙郡治之無聞緘翰及門遽辱里居之過  
與衰顏有腆厚意難勝伏惟某官奎壁儲精珪璋挺器  
早潜心于聖域亟馳譽于英躔竹帛功名因循蹉跎雲  
山中履鼓舞來歸方茲竊慕于高風豈謂反形于善頌  
省循非稱愧荷徒深

代賀運使加職

光被殊恩榮加秘職凡在庇庥之下學深懼忤之情恭  
惟某官業履高明風期俊邁薦膺使選皆出上知挺偉

節之公忠藹通才之強敏裕民足國不勞四賦之經考  
實論功寧俟三載之陟緊寵光之載錫諒眷遇之彌隆  
要任所階僉評惟允某側聞加命倍劇忻悰望森戟以  
誠馳阻崇墉之虔謁

代謝諸司及鄰郡

六屬脩官僅免曠官于天府一麾假守慙非近理之人  
材爰托庇庥實深忻幸

鄰郡云深幸善  
隣獲依大庇

重念某斗筭微

器駑散凡姿漫仕江淮之間薄遊輦轂之下紫微青瑣

難追翰墨之時英皂蓋朱幡尚取簿書之俗吏自天疏  
寵無地蔽羞此蓋伏遇某官提掖士流推轂善類陰借  
齒牙之溫潤曲矜羽翮之凋零致茲懦庸亦叨委寄懋  
明德意祈仰合于詔條祇奉簡書庶不違于約束永惟  
疏拙更賴函容佩荷至深敷宣罔既委寄以下鄰郡云  
露分美化稍靈海  
之餘波景仰老成况高山之  
在目載言忻佩豈易敷陳

代荅新通判

冒玷分符適諧視印內惟謏薄何以堪任媿脩謝之未

遑辱騰書之先及勤詞載玩謙德難勝伏惟某官望重  
朝端材標國器尚屈偏州之佐猶安仙里之居諒峻召  
之非遙豈辱蹤之得比更祈葆鍊式慰頌瞻仰荷之情  
敷宣罔既

代人謝舉改職官

荆南

三語玷員苟逴西曹之謫二天表行濫蒙東郭之收云  
云竊以難全者天下之才易事者君子之道惟才異用  
故有貴于器使惟道善貸斯不吝于甄收若羣材成庭

而根闔居楔之亦求如庶羞享神而繁蘋蘊藻之猶薦  
要當博取豈或遐遺云云是故南陽識范滂澄清之志  
於在功曹北海知孫韶輔佐之才方為郡掾何必冉冉  
趨庭之屬訖無峩峩奉璋之資惟荆巨藩實楚重地襟  
江佩漢控蜀臨吳節制乎十餘州部屬乎八大縣固有  
廉潔善吏亦多通達名儒循良餘古人風論議究當世  
務有將有相宜可以為君得人興賢興能亦足使在位  
美俗如某者簪裾未胄詩禮寒門發策決科憚加鞭于

蒲柳抱闕擊柝甘竊食于桑榆屬王事之不遑曾私恩  
之靡及公激何啻萬里蒞官初未二年險阻艱難蓋備  
嘗矣欽歎歷落真可憂焉敢遽比德於青州從事惟知謹職  
於白水真人云云某官云云揆藻儒林英聲夙著策名朝  
列令聞亟馳薦揚歷于省垣屢光華于使節斗南何有  
冀北應空尚淹夔契之經綸暫膺方虎之委寄一戟不  
折羣蠻來威拓地開疆日始逾于百里褒功顯德歲將  
見于九遷然而云云臨機應變舉必出于萬全拔滯振



淹得但希于十半遂令孱陋亦預品題朱雀帳前欲免  
望塵之拜青油幕下或當倒屣之迎僅同護屈之信稍  
類飛鴻之漸敢不矜持士節佩服官箴雞壘豕零誓圖  
來効免葵燕麦忍取虛名尚無愧堪一割如鉛刀豈不  
能致千里如跛鱉已蒙與進登激浪之龍門竊幸同升  
附追風之驥尾

簡

與明應仲

傳情爲此說亦過矣猶曰道在通亦言道之理無不在耳予一以貫之言理之無二耳思無邪存其誠言求道之方耳學若見道聖人之道自當解釋無有疑碍雖自立言而自然與相關通不必疑其皆口耳也悲夫學者翫聖人之言久矣今有以聖人之言教者譬猶青巾携籃行市中貨墨雖真呂仙莫之信矣故君子之徒每相戒不以言語輕示人正爲徒取侮矣且吾友以爲道若平常則是匹夫匹婦守常而無知者便是真得道人此

又不然聖人故曰百姓日用而不知夫婦之愚日用則有之不可謂得道萬物皆由道惟聖人能體之學未至聖則有知道知道不必能體然直謂之專口耳則不可也學者有講習講然後明習然後固六經奧旨學者所當盡心求之經而得吾心求之吾心而得聖人之心則一將有堯舜禹湯周孔不以文字傳者無異何用撥弃文字蔑視師友然後為善學耶所未敢聞命者如此若以為不言更望反復見教與公非世俗之交雖極言無嫌

也

與黃思賢侍郎

某曾祖母享年九十有三方無恙時家兄有子女二是  
為五世孫大父享年八十有八方無恙時家兄復有兒  
女孫各缺亦五世孫也今大人八十歲家兄之孫十四  
五矣加數年見元孫不難世綵名堂為是也然敝居舊  
為綵戲亭中奉大夫劉會元為作記昨任秀州儀曹日  
又嘗以名官舍之軒故黃秀實作詩序止道加禾綵戲

軒事後以綵戲無相繼見高元意而軒亭似非燕老之地故更建堂而以世綵名焉前後題詩者皆主賦此事而記序異詞軒亭異所若不足考願得數言序而合之幸甚幸甚

與謝參政任伯容

某近日聞諸大盜皆渡江但以為江北無所得行劫就食勢當如此今日見偽赦書方知有畫江之意當是為所迫逐而來然亦安知其無所授耶每日十數萬縱行

江東恣行殺掠江東之人宜無免者豈不痛哉諸將縱賊不敢輒擊朝廷避敵不敢寧居懦弱之民將安逃其死乎僕竊以爲天下未有無其志而能為之者况大勲大業豈容畏避苟且而欲望其有成乎靖康之失獨在于不能決戰以至遺恨滿天地尚可蹈其轍乎光武親冒矢石而獨勇于大戰盖其志既定謂天子此必相我非輕用其身也今敵與大盜皆嗜殺人深憤恨是天相我之時也何憚而獨避之乎四海顛顛望朝廷為之

主敵騎未動已先廢百司庶務但為遷徙計不知終欲何為江北方務聚人而我實散之得失將何如哉此僕所痛心而不能已也仰恃嘗遊門下敢爾僭率倘可復吾君否死罪死罪

答陳幾叟

前書承報示春夢且有相勉意良好笑翰林學士豈可使學做耶假令萬一真有誤命則有力辭而已然平日不願為詞臣如荒蕪拙澁殊不可為此公所知者亦復

有鄙見與世不合雖公亦未必知近世詞命君褒其臣  
不啻如諛佞者之頌德未有鄉黨之行尺寸之功而除  
書累千百言至有批荅多于辭表者僕常不以為然又  
有甚不近人情者除命方新比德伊周猶若有餘俄而  
貶黜則曾閤巷小人之不若他日召還或又復為伊周  
此皆詞命不吝其始之過也自古除書無如微子之命  
褒稱為多彼自是作賓于王家故特異然亦未比後世  
之一二如舜命九官非不重也豈在多詞矧當艱難倉



遽之時乃猶崇飾虛文不已獨不可少變從簡嚴乎如  
欲如今日之詞臣使僕能文亦所不敢况不必能也常  
欲建明此一事顧未有便偶公亂夢聊亦閒論當一夕  
劇談耳

與秦相公

某今日以在告不得詣府第請問事宜訪聞兩日人情  
惶惑引去者衆以愚鄙所見且須別降詔書曉諭中外  
使人無疑心然後國事可爲蓋前日所榜賜諸帥詔不

肖所以喋喋有請者非謂其簡畧未盡正謂立意未厭  
人心蓋前此舉國之人皆不以和議爲然今徒云已許  
歲幣等事是猶不以和議爲未是此人情所以洵洵也  
要須痛自引咎謂我所見不明猶不悟敵國之言不可  
信至於佛億兆憤怒之心抑貔虎踴躍之氣求從所欲  
果又墮其計中此我之過也自今一意治兵更無他議  
若秋高馬肥敵騎益至當議親征與之決戰人心攸歸  
天道效順我之成功庶可必也麻制既難爲榜示檄書


又未出示衆庶不見朝廷指畫次第故未能無疑耳山  
東河北傳檄以諭人心似不可緩雖道路不通亦須委  
自諸將付硬探人多方達朝廷之意茲其時也伏幸裁  
處

與荆南知府劉節使

錡

某頓首伏承出師屢捷大挫犬羊之鋒妙算竒勳暴白  
赫奕雖深山窮谷之人莫不傳聞而鼓舞何其盛哉高  
明固不自以爲功然天下後世孰能掩之某衰朽亡能

待盡朝夕尚幸朝廷早以恢復爲大計委于公庶其濟也公能無意乎哉因輒僭及



高峯文集卷九